



Լևոն Խեչոյան

Պաղ քամի

Գյուղի ամենագեղեցիկ աղջիկն ամուսնացավ: Հորեղբորս տղան մեր գյուղի անտառում գառ մորթեց, Ախալքալաքի զինկոմի սարիատից ու կայագորից պաշտոնավոր մարդկանց հրավիրեց, կերան, խմեցին: Սպայի կոչում ստացավ, կամավոր գնաց Աֆղանստան՝ կռվե լու: Այդ օրերին պրոպագանդայի բոլոր միջոցները զօր ու գիշեր խոսում էին այնտեղ ինտերնացիոնալ պարտքը կատարող մեր զորքերի մասին: Հորեղբորս, հաստ նոսր բեղերով կինը գնացել էր գյուղխորհուրդ, որպես պատերազմի մասնակցի ընտանիք, լրացուցիչ՝ քսանհինգ հար հողաբաժին էր պահանջել: Գյուղխորհրդի նախագահը նրան մերժել էր: Ու երբ բացատրել էր, որ նրան ոչ թե զորակոչել են, այլ նա ինքն է կամավոր, իր կամքով գնացել, մեր ընտանիքին նոր ահ հասավ, նոր սուգ սկսվեց, նոր հորեղբորս կինը ամբողջ գյուղով ողբը գցեց: Նոր հասկացանք, որ նա այլևս հետ չի գա: Երկու տարվա ծառայության ընթացքում նամակներ էր գրում: Ուղտերի մեջքին նստած, ուռած փորերով մանչուկներին գրկած, անապատներում՝ չալմայված դեմքերով մուսուլմանների հետ, սեւ ակնոցներն աչքերին՝ տարբեր զենքերով զինված, նեգատիվներ էր ուղարկում, գյուղում լուսատպում էինք ու հիանում նրանով: Մի օր էլ արձակուրդ եկավ: Մոսկվայից՝ կտրոնների հատուկ խանութից «Շարպ» մակնիշի մագնիտոֆոն էր առել եւ տատիս համար նիկելապատ, կուրացուցիչ շողշողացող մի խոշոր գիշերանոթ էր բերել: Տատիս ասավ . «Աբա, էլ զուգարան չես գնա, արտասահմանյան է»: Տատս զարմացած ասավ . «Քա, ի՞նչ կըսես, մանչ, ամոթ է, ի՞նչ է, արտասահմաններում ժողովուրդը տների մե՞ջ է անում»: Երբ մերոնք գնում էին դաշտային աշխատանքների՝ տնից մինչեւ բանջարանոցի ծայրամասում գտնվող զուգարանը մի երկար պարան էին կապում, տատս պարանը բռնած, զուգարան

Էր գնում-գալիս, ու նրա կուրությունը ոչ մեկին նեղություն չէր տալիս: Երբեմն պատահում էր՝ պարանը մեջտեղից այծերն էին կրծելով կտրում կամ մենք էինք արձակում զուգարանից ու մեկ ուրիշ բանից կապում: Մոլորված կանգնում-մնում էր ճանապարհի մեջտեղը ու շփոթելով մեր բոլորի անուններն իր հանգուցյալ ծնողների անվան հետ՝ օգնություն էր կանչում: Նրանից կինո գնալու համար փող էինք պահանջում ու նոր տեղ հասցնում: Տանեցիները դաշտ էին գնացել՝ խոտ հավաքելու: Երվանդը, թախտին պատկած, առաստաղին էր նայում ու մագնիտոֆոն լսելով անցկացնում արձակուրդի առաջին օրերը: Տատս ծալապատիկ նստած տերողորմյան էր քաշում: Մենք դռանը խաղում էինք, փոստատար Գաբոն եկավ, մենք նրա հետեից մտանք օդան: Երվանդին նամակ տվեց: Տատիս ասավ . «Մամ, մի պապիլոզ տուր, ինը վերջացել է»: Տատս մի հատ էլ ինքը վառեց, նրանք գրուցում էին: Տատս հարցրեց . «Գաբո ջան, Էդ ի՞նչ նամակ էր»: Գաբոն ասավ . «Չգիտեմ, Էնտեղից էր, Աֆղանստանից»: Հետո Երվանդին մոտեցավ . «Երվանդ ջան, մեզ ներող եղեք, քանի՞ մեղալ ունես»: Երվանդը նամակը ձեռքին նստել, լռում էր: Գաբոն ասավ . «Երվանդ ջան, մենք օբսալյուտնո...»: Նա ասավ . «Որ ելա տեղիցս, եկած ճամփադ չես գտնի»: Գաբոն ասավ . «Մենք ներողություն», ու տատիս հարցրեց . «Մամ, դու չգիտե՞ս, մեր տղան քանի՞ մեղալ կունենա: Ասում են՝ վերին գեղերից Էնտեղից մի ոտքով եկած մեկն էլ կա, յոթ-ութ հատ ունի, չիդեմ, ընչի սիրտս վկայում է, որ մեր Երվանդը ավելի շատ կունենա»: Տատս ասավ . «Չգիտեմ, Գաբո ջան, տեսա՞ր խոսելու ձեր: Էս մեր ծովածը մեզ Էդպես բան ասող, ուրախացնողը չէ»: Տատիս խնդրեց, որ թող մի բան անի, իմանա ու ինքը գնաց: Երվանդը նամակը ձեռքին դեռ նստած էր, հետո մագնիտոֆոնը անջատեց, տատս դեռ ծխում էր, արոտից հետ պահած հիվանդ այծը թափառում էր օդայի մեջ, նա դարձյալ նամակը ձեռքին նստել, մնացել էր: Տատս հարցրեց . «Մանչ, մեջքիս սառը, պաղ քամի է փչում, դուրը խոն բաց չի՞ մնացել: Խաղ աստղը ինչի՞ լռեց, Էդ ի՞նչ նամակ էր, չի՞նի՞ քեզ հետ են կանչում»: Ասավ՝ չէ: Հինգ օր անց փոստատար Գաբոն դարձյալ նամակ բերեց: Հետո՞ էլի: Տատս ասավ . «Ինչ-որ տեղից մեջքիս սառը քամի է փչում»: Ու այդ օրը հաստատապես հայտարարեց, որ մեր տան մեջ մեզանից բացի էլի մեկը կա: Ասինք . «Մխավում ես, արոտից հետ պահած այծն է տան շվաքներում թափառում»: Ասավ . «Այծը չի թափառում, այծը խրտնած է ինչ-որ բանից»: Ասավ . «Գոնում մալը ամբողջ գիշեր չորոճաց»: Մնաց հորեղբայրս ասաց . «Մալ է, էլի, վաղը գիշեր կորոճա»: Տատս ասավ . «Մանչը

հետս որ խոսում է, ոնց որ անցյալի միջից խոսա, մի բանը կա»: Նրան ասին .
 «Տեսողությունդ կորցրել ես, մտքով քեզնեն դուրս բաներ ես տեսնում»: «Աստված
 տա այդպես լինի, բայց տան մեջ թափառողը կին է, փեշերի շրշյունն են առնում»:
 Ասինք . «Կնի՞կ, կարո՞ղ է ջրահարս է մտել տունը...», ծիծաղեցինք: Ասինք .
 «Ծերացել ես, աբա»: «Կատուն խելոած՝ հինգ օր է տուն չի գալիս, ծիծաղում եք,
 թե ծերացել են: Արդեն տասներորդ գիշերն է գյուղի բոլորը բուն չի կանչում»:
 Մնաց հորեղբայրս ասավ . «Տարիքին նայե, խոսացածին նայե, ի՞նչ անենք, որ
 բուն չի կանչում, սուգ մտնե՞նք: Աբա, ախր հասկացիր, քոռ բու է, կպել է քարին,
 ծառին սատկել է, չկա»: Տատս ասավ . «Ուր է, թե ձեր ասածը լինի, ախր օդում
 չղջիկն էլ չի պտտվում...»: Մի օր Երվանդը ձուկ բռնելու էր գնացել, էլի նամակ
 եկավ: Տատս ասավ . «Մանչը դադարը կորցրել է, մի բացեք, տեսնենք էդ ի՞նչ
 նամակներ են»: Բացեցինք՝ փոքրիկ սպիտակ թուղթ էր: Տատս զարմացավ .
 «Գիր չկա՞, առանց գրի ի՞նչ նամակ»: Ասավ . «Մեկը նստեց անկյունում, էդ ո՞վ
 էր»: Ասինք . «Մարդ չկա, բարձն էր ծալքից ընկավ»: Ասավ . «Ինչ-որ տեղից
 սառը, պաղ քամի է փչում»: Ասինք . «Դուրը գոց է»: Թոշակառու Մարկոսը
 Ախալքալաքի շրջանային թերթի երբեմնի խմբագիրն էր: Մորս հետ գնացինք
 նրա մոտ: Ասինք . «Մեր աբան ասում է, չգիտենք ու չենք հասկանում, էս ի՞նչ
 բան է, տղան ամեն հինգ օրը մեկ էս նամակներից է ստանում»: Խմբագիր
 Մարկոսը թղթին նայեց, հետո՝ մեզ . «Էդ երկիրը մտնելուց առաջ, մի հատ թող
 ուսումնասիրեիք էդ ժողովրդի պատմությունը, տեսնեիք՝ երբեւէ դրանք
 հնագանդվե՞լ են որեւէ մեկին, հետո թող նոր ավիրեիք»: Նա մեզ հետ այնպես էր
 խոսում, կարծես ես ու մայրս էինք մտել այդ անհնագաղ երկիրը ավիրելու: Մինչ
 նրա կինը՝ Շուշանը, ակնոցները կբերեր, ականջներս պինդ ձգեց անցյալ օրը
 իրենց հանդից գազար գողանալու համար: Հետո երկար թղթին նայեց . «Ինչքան
 իմ գիտելիքները հուշում են, այսպես ասած՝ սա նամակ է, կսկծից տառապող մոր
 նամակ: Մուսուլմանների մոտ նամակագրության այս ձեւը հետապնդելու միջոց
 է: Այս սպիտակ թուղթը նշանակում է, թե մայրը իր ուրվական-ինքնանմանակին
 ողարկում է մեր մոտ՝ Երվանդին հանգիստ չտալու»: Տատիս պատմեցինք:
 Ասավ . «Ինչ-որ տեղից մեջքիս սառը, պաղ քամի է փչում»: Երեսին խաչ
 հանեց . «Իսու Քրիստոս, էս ի՞նչ մեծ մեղք է գործվել...»: Հորեղբորս ասավ .
 «Առավոտյան մի որձ գառ հետ առեք հոտից»: Նա Սուրբ Հովհաննեսի
 պատվանդանին ուրվական մորից թողություն խնդրեց: Գառը մատղեցինք,
 բաժանեցինք գյուղին: Գյուղը չէր հանգստանում: Նա խիր գնացած կովերը հորթ

Էին գցում, իսկ ցուրը նախիրի մեջ չէր մտնում, ինչ-որ բանից սարսափած՝
բառաչելով գյուղ էր փախչում: Հետո Քոռ կամրջի մոտ գայլերը Երանոսի երկու
ոչխարներին էլ կերել էին: Սատանա Մուկուշը դաշտից տուն գալիս, հին
գերեզմանոցից իրեն կանչող օտար կնոջ ձայն էր լսել: Գյուղացիներն ուրվականի
իրենց հետապնդելը կապում էին Երվանդի արձակուրդ գալու հետ ու դժգոհում
էին:

Երվանդը մնաց հորեղբորս հետ, տան բոլոր անկյուններում ուռկանով
թակարդներ էին դնում եւ կացինն ու գերանդին առած՝ մարագի գոմի շվաքների
մութ տարածություններից ուրվականին քշում էին դեպի ցանցերը: Ու այնքան էին
թռչկոտում վեր ու վար, որ հորեղբայրս ասում էր . «Քիչ է մնում
միգափամփուշտս կտրվի, ընկնի»: Հետո հարբում էին, համարյա հարբում էին:
Մի անգամ խմած ժամանակ, շալվարի փողքը վերեւ քաշեց, ազդրին ձգած փոկ
երը արձակեց ու դնովի ոտքը շարտեց մտորների ետեւը՝ այն հավանական տեղը,
որտեղ կլինեք ուրվականը ու գոռաց . «Առ, շան քած, տես, բա ինչո՞ւ 41
թվականին իմ մայրը ոչ մեկի հետեւից չգնաց»:

Հորեղբորս կինը ասավ . «Լենինգրադից էդ անտերը ինը հարյուր ռուբլով բերել
տվեցինք, ինչի՞ ես ջարդում, տեսնեմ առավոտ առանց ոտքի ոնց ես քաղի
գնալու», եւ սկսեց լացել:

Տատս ասավ . «Մանչը դողում է, էդ ո՞վ էր Երվանդիս մոտեցավ...»: Երվանդը
ասավ . «Շվաքի դուռը բաց է, քամին է պտտվում»: «Ինձ մի խաբեք, տաք գոմի
միջով քամին որ անցներ, մալը կմնչար»: Երվանդը ասավ . «Կյանքներս կերար,
աբա, բան չեղած տեղը վախեցնում ես բոլորիս, էդ ինչի՞ միայն դու ես տեսնում»:
«Քա, բալա ջան, բողան չառած կովը հուզմունքից արդեն երկու օր է ցամաքել է,
կովին էլ խոն ես չե՞մ վախեցրել»: Առավոտյան տատս սնդուկից հինգ հարյուր
ռուբլի հանեց, հորեղբորս ուղարկեց Ախալքալաք: Ջինկոմիսարը նրան ասել էր .
«Չէ, չեմ կարող: Հասարակ գինվոր լինեք, էլի կարելի էր մի բան հնարել, մի
ամիս էլ պահել: Նա սպա է, այն էլ հերոս: Երկու կարմիր աստղ ունի, էնա
համարյա հերոս է, էլի, նրա նման սպան այնտեղ պետք է, համ էլ կարող է ինձ էլ
ստուգեն...»: Մերոնք չէին իմանում՝ ինչ անեին: Տատս ասավ . «Ախր մանչուն
կրնկակոխ հետեւում է, մանչը օտարության մեջ չի կարող գլուխը պրծացնել»:

Երվանդին ասին . «Մի գնա, թող դատեն: Մի երկու տարի էլ կնստես»: Ասին .
«Մի գնա եւ վերջ»: Ասավ . «Չեմ վախենում: Այնքան էլ վախենալու բան չէ,
կգնամ: Ջենքը որ վրաս եղավ, կվախենա, չի մոտենա»: Հետո ուրվականը սկսեց
շրջել գյուղում: Նրա մասին սկսեցին խոսել այստեղ ու այնտեղ: Նրա
ներկայությունը զգում էին բոլորը: Խուճապահար հավերը սկսեցին ձվերը
կորցնել՝ դնում էին որտեղ պատահեր: Կանայք տների շուրջբոլորը թաց ծղոտ ու
աթար էին ծխացնում, որպեսզի նա բնակարանները չմտնի ու դժգոհում էին
Երվանդի արձակուրդ գալուց: Մի օր, երբ Երվանդը տանը չէր, տատս
հորեղբորս կնոջը կանչեց ու ասավ . «Դու մայր ես, պիտի կարողանաս անել...»:
Տատս նրա հետ շշուկով խոսեց: Հորեղբորս կինը շշմել, նայում էր նրան: Տատս
ծխում էր, ասավ . «Պիտի կարողանաս անել: Դա միայն դու կարող ես անել...»:
Հորեղբորս կինը, երեկոյան թեյի ժամանակ, եռացած թեյնիկը «պատահաբար»
ձեռքից գցեց: Բժիշկը Երվանդի գնալը մի ամսով հետաձգեց: Ուսից մինչեւ
ձեռնաթաթը առաջին աստիճանի այրվածք էր ստացել: Նա ոչ մեկին չլսեց,
հրաժարվեց հիվանդության թերթիկից, վերցրեց ճամպրուկը ու համբուրվեց
բոլորիս հետ: Տատս ասավ . «Ինչ-որ տեղից մեջքիս սառը, պաղ քամի է փչում»:
Չպատասխանեցինք, համարյա չպատասխանեցինք: Ասին . «Աբա, տաք,
պայծառ արեւ է»: Ասավ . «Մեղվի ձայն չեմ առնե, մեղուն փեթակից դուրս չի
գա, օդի մեջ կտրող պաղություն կա»: Ասին . «Բացատրություններ տալու տեղ
մեջքիդ շալ կապե»: Ասավ . «Մեկը դուրս եկավ մանչուն կրնկակոխ»: Ասինք .
«Կա տուն էր ոտնատակ ընկնում»: Ասավ . «Կատուն չէ, կատվի քայվածքը
էդքան թեթեւ ու պաղ չէ»: Հորեղբայր Մնացս բղավեց . «Կրակ խոմ չես, այ կնիկ,
խելքդ գլուխդ ժողվե»: Տատս ասավ . «Էն կինն է, տանից դուրս եկավ, գնաց
մանչու հետեից»: